

大正藏第 08 册 No. 0252

普遍智藏般若波罗蜜多心经 1 卷

No. 252 [Nos. 250, 251, 253-255, 257]

普遍智藏般若波罗蜜多心经

摩竭提国三藏沙门法月重译

如是我闻：

一时佛在王舍大城灵鹫山中，与大比丘众满百千人，菩萨摩訶萨七万七千人俱，其名曰观世音菩萨、文殊师利菩萨、弥勒菩萨等，以为上首。皆得三昧总持，住不思議解脱。

尔时观自在菩萨摩訶萨在彼敷坐，于其众中即从座起，诣世尊所。面向合掌，曲躬恭敬，瞻仰尊颜而白佛言：「世尊！我欲于此会中，说诸菩萨普遍智藏般若波罗蜜多心。唯愿世尊听我所说，为诸菩萨宣秘法要。」尔时，世尊以妙梵音告观自在菩萨摩訶萨言：「善哉，善哉！具大悲者。听汝所说，与诸众生作大光明。」

于是观自在菩萨摩訶萨蒙佛听许，佛所护念，入于慧光三昧正受。入此定已，以三昧力行深般若波罗蜜多时，照见五蕴自性皆空。彼了知五蕴自性皆空，从彼三昧安详而起。即告慧命舍利弗言：「善男子！菩萨有般若波罗蜜多心，名普遍智藏。汝今谛听，善思念之。吾当为汝分别解说。」作是语已。慧命舍利弗白观自在菩萨摩訶萨言：「唯，大净者！愿为说之。今正是时。」

于斯告舍利弗：「诸菩萨摩訶萨应如是学。色性是空，空性是色。色不异空，空不异色。色即是空，空即是色。受、想、行、识亦复如是。识性是空，空性是识。识不异空，空不异识。识即是空，空即是识。舍利子！是诸

法空相，不生不灭、不垢不净、不增不减。是故空中无色，无受、想、行、识，无眼、耳、鼻、舌、身、意，无色、声、香、味、触、法，无眼界乃至无意识界。无无明亦无无明尽，乃至无老死亦无老死尽。无苦、集、灭道，无智亦无得。以无所得故，菩提萨埵依般若波罗蜜多故，心无罣碍。无罣碍故，无有恐怖，远离颠倒梦想，究竟涅槃。三世诸佛依般若波罗蜜多故，得阿耨多罗三藐三菩提。故知般若波罗蜜多是大神呪，是大明呪，是无上呪，是无等等呪。能除一切苦，真实不虚。故说般若波罗蜜多呪。」

即说呪曰：

「揭谛 揭谛 波罗揭谛 波罗僧揭谛 菩提 莎婆訶」

佛说是经已，诸比丘及菩萨众，一切世间天、人、阿修罗、干闥婆等，闻佛所说，皆大欢喜，信受奉行。

普遍智藏般若波罗蜜多心经

【经文信息】大正藏第 08 册 No. 0252 普遍智藏般若波罗蜜多心经

【版本记录】CBETA 电子佛典 Rev. 1.12 (Big5)，完成日期：2009/04/23

【编辑说明】本数据库由中华电子佛典协会（CBETA）依大正藏所编辑

【原始数据】庄德明大德提供，CBETA 自行扫描辨识，CBETA 提供新式标点，其他

【其他事项】本数据库可自由免费流通，详细内容请参阅【中华电子佛典协会数据库版权宣告】
